

03 NOV 2003

Abdullah-Penghargaan (Bergambar)

ANGGOTA PARLIMEN DIMINTA BERIKRAR UNTUK TERUSKAN PERJUANGAN DR MAHATHIR

KUALA LUMPUR, 3 Nov (Bernama) -- Perdana Menteri Datuk Seri Abdullah Ahmad Badawi hari ini meminta semua anggota Parlimen berikrar akan terus berjuang mempertahankan kedaulatan, kemerdekaan dan kesejahteraan negara menerusi seluruh dasar, strategi dan program yang telah diperkenal serta diperjuangkan oleh Tun Dr Mahathir Mohamad.

Dalam merakamkan setinggi-tinggi penghargaan daripada seluruh rakyat Malaysia kepada Perdana Menteri Malaysia keempat dan anggota Parlimen Kubang Pasu itu, Abdullah berkata beliau akan terus berusaha ke arah mencemerlangkan rakyat Malaysia di hari muka berasaskan semangat Perlembagaan Persekutuan, prinsip-prinsip rukun negara dan juga matlamat utama Wawasan 2020.

"Tun Dr Mahathir Mohamad telah mengabadikan diri untuk negara bangsa Malaysia selama tempoh 22 tahun, 3 bulan, 15 hari sebagai Perdana Menteri, bermula dari 16 Julai 1981 sehinggalah kepada tarikh beliau bersara pada 31 Okt lalu.

"Sesungguhnya khidmat beliau kepada negara bangsa bermula lebih awal dari itu. Suara bernas lagi tegas beliau mula bergema di dewan ini, sejak dipilih sebagai ahli Parlimen bagi kawasan Kota Setar selatan dalam pilihan raya umum yang diadakan pada 25 April 1964."

Abdullah berkata demikian ketika mengemukakan usul terima kasih kepada Dr Mahathir serta menggariskan arah haluan kepimpinan di Dewan Rakyat di sini hari ini.

Beliau berkata Dr Mahathir juga adalah orang kedua paling lama selepas Tun Abdul Ghaffar Baba berkhidmat sebagai anggota Parlimen.

Dr Mahathir, kata Perdana Menteri, telah menjadi anggota Parlimen selama hampir 36 tahun, 29 tahun sebagai anggota jemaah menteri dan selama lebih 22 tahun sebagai Perdana Menteri.

"Sewaktu menjadi ahli Parlimen biasa di dewan rakyat mahupun di dewan negara, beliau telah menyuarakan pendapat secara berani, secara kritis, secara terbuka dan secara berterus terang.

"Beliau memiliki identiti sebagai seorang ahli Parlimen yang menyuarakan pandangan bernas dan berpendirian tegas. Beliau sentiasa membawa nada pembaharuan, sering kali mendahului jauh ke hadapan daripada segi pandangan, pendirian, unjuran dan wawasan," kata Abdullah, yang mengangkat sumpah sebagai Perdana Menteri Malaysia yang kelima Jumaat lepas.

Abdullah juga berkata Dr Mahathir mewarisi daripada kepimpinan terdahulu daripadanya sebuah negara yang stabil daripada segi politik dan ekonomi dan hasil usahanya telah membolehkan negara melonjak ke satu tahap kejayaan yang membanggakan.

Katanya Dewan Rakyat perlu menerima hakikat bahawa Dr Mahathir telah berkhidmat dengan penuh dedikasi, tegas, cekap, berkesan, cemerlang dan bijaksana.

Abdullah berkata rakyat menghargai serta menyanjung tinggi perjuangan, pengorbanan, budi, jasa dan bakti "Anggota Parlimen Kubang Pasu" yang amat murni, abadi serta tidak ternilai besarnya, menerusi pelbagai dasar, strategi dan program yang pragmatik, demi perpaduan dan ketahanan nasional, keselamatan dan kesejahteraan bangsa serta kemakmuran dan kegemilangan negara.

Katanya usul terima kasih kepada Dr Mahathir juga diambil menyedari serta menginsafi konsistensi, kesungguhan dan keprihatinan Dr Mahathir di

dalam perjuangannya memartabatkan Islam dan umat Islam di seluruh jagat, khususnya di negara Malaysia yang majmuk, menerusi penguasaan dan kecemerlangan ilmu di semua bidang kehidupan mutakhir.

Abdullah berkata usul itu juga adalah untuk menyokong penuh kebijaksanaan bekas Perdana Menteri di dalam menangani krisis ekonomi negara akibat kedurjanaan pegganas kewangan antarabangsa menerusi strategi ekonomi, kewangan dan pengurusan yang unik, efektif dan diiktiraf dunia.

Abdullah, yang buat pertama kali membentangkan usul di Dewan Rakyat sebagai Perdana Menteri, berkata usul terima kasih itu juga bagi mengiktiraf Wawasan 2020 yang diilhamkan Dr Mahathir sebagai satu doktrin perdana bagi perjuangan membina negara Malaysia yang terus berdaulat dan merdeka serta lebih bersatu padu, sejahtera, aman, makmur, maju, cemerlang, bermaruah dan berwibawa di era globalisasi dan neo-kolonialisme.

"Ia (usul itu) mengakui bahawa perjuangan ahli Parlimen Kubang Pasu memajukan ICT (Teknologi Maklumat dan Komunikasi) menerusi penubuhan Koridor Raya Multimedia, serta memajukan bioteknologi menerusi kewujudan lembah bio akan memberi manfaat besar kepada bangsa dan negara Malaysia di hari muka," katanya.

Abdullah berkata perlu diakui bahawa pembangunan prasarana fizikal dan pembangunan sumber manusia negara berlaku paling pesat dalam tempoh Dr Mahathir menjadi Perdana Menteri.

"Yang lebih penting adalah kejayaan meletakkan negara mendapat pengiktirafan dunia hingga Malaysia dijadikan negara contoh daripada segi kestabilan politik, kemakmuran ekonomi, perpaduan kaum dan toleransi agama serta diiktiraf sebagai sebuah negara Islam yang paling progresif."

Abdullah dalam usul itu berkata melalui kepimpinan Dr Mahathir, negara kecil Malaysia telah bangun untuk memainkan peranan besar di forum antarabangsa.

"Kerjasama Selatan-Selatan diberikan nafas baru. Asean berjaya diperbesarkan. Persidangan Negara-Negara Komanwel, Persidangan Negara G15, Persidangan Pergerakan Negara-Negara Berkecuali (NAM) dan Persidangan Pertubuhan Persidangan Islam (OIC) dapat dianjurkan di Malaysia.

"Hari ini Malaysia menjelma sebagai negara ke-18 terbesar dunia daripada segi perdagangan. Malaysia telah menggariskan wawasan jangka panjang menjadi sebuah negara maju dalam tahun 2020," kata Abdullah.

Perdana Menteri juga berkata Dr Mahathir telah berjaya membina dan menyemaikan keyakinan diri, kebanggaan nasional, nilai maruah dan semangat kenegaraan di kalangan warga dan sekarang "beliau adalah wira bangsa, wira negara, (yang) telah mengharumkan nama negara, bangsanya di serata dunia."

Katanya Dewan Rakyat merakamkan setinggi-tinggi penghargaan dan terima kasih atas segala jasa, bakti, cetusan pemikiran, kebernasan pendapat, pengorbanan, khidmat, kesungguhan dan kegigihan Dr Mahathir ketika dalam kerajaan.

Dewan Rakyat, kata Abdullah juga merakamkan setinggi penghargaan dan terima kasih kepada Tun Dr Siti Hasmah Mohd Ali dan seluruh anggota keluarga Dr Mahathir yang turut melakukan pengorbanan besar untuk membolehkan bekas Perdana Menteri menumpukan tenaga, pemikiran dan masa, mengabdikan diri berkhidmat bukan sekadar untuk negara dan warga Malaysia, malah di rantau ini, di kalangan negara-negara membangun dan negara-negara Islam.

"Kita mendoakan semoga hari-hari persaraan beliau dilimpahkan segala rahmat dan keberkatan, semoga beliau berada dalam keadaan sihat lagi sejahtera. Semoga beliau dan Dr Siti Hasmah serta keluarga dilimpahkan segala kebahagiaan.

"Semoga khidmat bakti beliau (Dr Mahathir) diterima oleh Allah swt sebagai amal makruf, dianugerahkan ganjaran dunia, ganjaran akhirat. Sebesar-besar hadiah persaraan yang dapat warga Malaysia berikan kepada

beliau adalah untuk meneruskan wawasan dan impian, menjadikan Malaysia sebuah negara maju, makmur, aman dan stabil," kata Perdana Menteri.

Abdullah berkata beliau amat bersyukur kerana Dr Mahathir telah mewariskan satu kejayaan, "kejayaan mengekalkan kestabilan politik, kejayaan mengukuhkan perpaduan warga, kejayaan membangunkan ekonomi negara dan kejayaan mengisi erti kemerdekaan."

Atas tapak kejayaan itu, dengan bimbingan ilahi dan mengambil pedoman daripada kejayaan yang telah dicipta oleh pemimpin-pemimpin terdahulu, dengan kerjasama anggota jemaah menteri dan sokongan setiap lapisan rakyat, Abdullah berkata beliau akan berusaha menumpukan fikiran dan tenaga, meneruskan usaha membina kejayaan lebih cemerlang, gemilang dan terbilang.

Katanya Malaysia bersyukur kerana dikurniakan dengan barisan pemimpin yang baik dengan keempat-empat Perdana Menteri terawal -- Almarhum Tunku Abdul Rahman Putra, Allahyarham Tun Abdul Razak Hussein, Allahyarham Tun Hussein Onn dan Tun Dr Mahathir Mohamad -- telah mewariskan kepada kepimpinan terkemudian sebuah negara yang aman, stabil dan makmur.

"Pemimpin terkemudian berupaya membina kejayaan lebih cemerlang atas kejayaan yang telah dicipta oleh pemimpin sebelumnya. Setiap Perdana Menteri telah mencipta kejayaan dalam era kepimpinan masing-masing dan Dewan ini wajar memperingati jasa dan bakti setiap Perdana Menteri, mewariskan kepada warga sebuah negara yang stabil lagi makmur," kata Abdullah.

-- BERNAMA  
SR MFJ RHM